

施設論卷第三第四同卷

通六

宋西天三藏朝散大夫感化精妙佛傳慈覺師法護等奉詔譯

對法大論中因施設門第四之二

又復阿難我出母胎未久之間即觀四方乃作是念我當得成如來應供正等正覺已當為衆生演說四聖諦法此是菩薩先現瑞相又復阿難我出胎未久即作是言今我此身是邊際生乃作是念我當得成如來應供正等正覺已當為一切衆生普盡生死邊際此是菩薩先現瑞相又復阿難我出胎未久空

中自然雨衆天花謂優鉢羅花俱母陀花鉢納摩花奔拏利伽花等又雨衆妙沉水薰陸栴檀香秣及散天花乃作是念我當得成如來應供正等正覺已具大智慧具大福德飲食衣服牀座醫藥諸受用具悉皆豐足此是菩薩先現瑞相又復阿難我出胎未久空中自然奏天音樂乃作是念我當得成如來應供正等正覺已聲聞十方又復阿難我昔宮中與諸宮屬同趣牀座乃作是念從今已往我不復處王宮之座今我此座是即最後所

處之座作是念已從牀座起詣王宮門志欲
求出時有聖賢密開其門我於是時出宮門
已漸次前詣重重宮禁一一門首皆有聖賢
爲開其門我於爾時即作是念我當得成如
來應供正等正覺已普爲衆生開甘露門此
是菩薩先現瑞相又復阿難我時乘彼迦蹉
伽馬王出王城已至於他邦即時下馬乃作
是念今此是我最後所乘王宮寶馬我時所
有衆莊嚴具及迦蹉伽馬王而悉不受還其
馭者乃起是念今此是我最後所有世間嚴

具而悉棄置不復受之阿難當知我時即持
妙色寶劍自斷頂髻斷已復念今此是我最
後自斷頂髮寶髻不復重生即時見一被袈
裟衣者儀相調善見已歡喜前詣彼所而謂
之曰我今奉汝迦尸迦衣汝可授我袈裟法
衣通六即作是念今此是我最後所棄王宮之服
不復重以俗服被體又復阿難其後我於吉
祥長者所受吉祥草詣菩提樹下自敷其草
端身正念跏趺而坐作是念言我若不成阿
耨多羅三藐三菩提果誓願不起于座又作

是念我今快得善利何以故一切衆生處無
明中住著無明無明卵殼障覆慧眼我當破
無明卵令諸衆生吉祥安樂又復阿難我成
佛未久觀見衆生世間所生亦世間老有利
根者有中根者有下根者其下根者隨其行
相而調伏之乃至不聞正法諸缺減者彼等
衆生我觀見已於彼彼所起大悲心爲說正
法而化度之又復阿難我復作是念我今快
得善利我於世間雜染中生而無雜染心意
所行

對法大論中因施設門第五

總說頌曰

如子下族并貧族 賊難劫初至十歲
牛貨勝身俱盧洲 無我及彼欲色界
佛從定起入涅槃 最後大衣不焚爇

又問何因菩薩於一切衆生中最上最勝有
不發大菩提心而能正信出家者邪答菩薩
長時觀諸衆生等同一子勤修善業長養成
熟勝妙果報現前克成法爾如是殑伽沙等
諸菩薩衆未有不發大菩提心而能正信出

家之者如其所說即是不能受欲樂故

又問何因菩薩不於下族中生答下族生者
習近慢心菩薩長時遠離諸慢親近善法修
習施作是故菩薩決定於其上族中生又若
菩薩下族生者即起謗訕

又問何因菩薩不於貧族中生答貧族生者
習近慳悋菩薩長時離慳悋垢親近修習廣
多施作無慳悋法是故菩薩決定於其富族
中生謂以菩薩諸有所得色聲香味觸等諸
境不歷艱苦自他平等而受用之又若菩薩

生貧族者即起謗訕

又問何因菩薩不生極邊國土及多賊難鄙
惡之方答邊惡國土於戒於見而悉艱苦不
與菩薩相似同等而菩薩者勤修諸善長養
成熟現前勝妙果報克成是故菩薩決定於
其大國中生設有利根清淨衆生值遇菩薩
大威德者然亦不能發起最上無漏善法所
謂無上正等菩提緣覺菩提聲聞菩提到彼
岸法及餘最上無漏善根

又問何因菩薩不於劫初時生彼時人壽始

八萬歲答劫初時人軟品根性所行愚鈍朴質種類不與菩薩相似同等菩薩大士大威德者於長時中勤修善法長養成熟設有利根清淨衆生值遇菩薩大威德者然亦不能發起最上無漏善法

通大

又問何因菩薩不於人壽最後十歲時生答人壽十歲之時廣多罪業廣多煩惱不與菩薩相似同等是故菩薩大威德者不於人壽十歲時生

又問何因菩薩不生西瞿陀尼洲答瞿陀尼

洲人軟品根性所行愚鈍朴質種類不與菩薩相似同等菩薩大士大威德者勤修善法長養成熟現前勝妙果報克成是故菩薩決定於其大國中設有利益根清淨衆生值遇菩薩大威德者然亦不能發起最上無漏善法所謂無上正等菩提緣覺菩提聲聞菩提到彼岸法及餘最上無漏善根

又問何因菩薩不生東勝身洲答如西瞿陀尼洲其事廣說

又問何因菩薩不生北俱盧洲答北俱盧洲

人較品根性所行愚鈍朴質種類隨作艱辛
不與菩薩相似同等菩薩大士大威德者於
長時中勤修諸善長養成熟現前勝妙果報
克成是故菩薩決定於其大國中生設有利
根清淨衆生值遇菩薩大威德者然亦不能
於一切處發起最上無漏善根而此俱盧洲^五
人無我所執此中問言此俱盧洲人何故無
我所執邪答謂以衆生數多境界廣大所受
境界咸皆悅意平等無差故無我所執
又問何因菩薩不生欲界諸天答謂欲界中

諸天子衆著諸境界愛樂放逸不與菩薩相
似同等雖能修持少分梵行不能廣爲比丘
比丘尼優婆塞優婆夷等四衆廣大宣演梵
行令諸天人各獲利益以是緣故不生欲界
諸天

又問何因菩薩不生色界諸天答謂色界中
諸天子衆雖能修持少分梵行而不能廣
爲四衆別別開演所有梵行令諸天人各獲
利益又復菩薩不於色界諸天趣證涅槃此
中應問何故色界天中不入涅槃答謂無色

相正受處故但作意已正入涅槃又問若如此說者不善心入邪無記心入邪答此說應知無記心入

又問何因諸佛世尊住世教化何故賢上大聲聞衆先入涅槃佛乃後入答以諸聲聞長時無間勤修善法長養成熟現前勝妙果報克成昔見世尊入涅槃者彼諸聲聞所有勝報即不圓成又復法爾殞伽沙數等諸佛世尊所有賢上大聲聞衆皆先涅槃佛乃後入如其所說入涅槃者諸佛世尊於第四禪不

動地中現前證入此中應問云何世尊入涅槃邪或復起邪答若有所起即無所入

又問何因如來世尊入涅槃已聖體既焚大衣如故若內若外都無所損答天威力故謂以諸天於佛世尊極生淨信又復二種制止不燒一者內身二者外財當知皆是佛神力故

對法大論中因施設門第六之一

總說頌曰

二緣及彼二衆出 聲聞三千大千界

大慈大悲二種心 不思議及隨順法
衆中差別所行中 如象王住地獄等
又問何因佛及輪王皆具三十二大丈夫相
一謂如來應供正等正覺二謂轉輪聖王答
轉輪聖王者往昔修因其事廣大於長時中
常起是念我當廣行布施植諸勝福長養一
切衆生淨持戒行世間癡暗無歸救者悉爲
救度如來應供正等正覺者隨諸所作一切
善法普施世間一切衆生廣發大願如願所
行捨家出家成等正覺以是因故轉輪聖王

如來應供正等正覺皆具大丈夫相
又問何因佛與緣覺於一時中不相值遇答
諸緣覺聚於長時中修緣覺法勝妙果報現
前克成無所願求於最上法無復施作亦不
樂欲親近恭敬瞻觀如來由是因故佛與緣
覺不同時出
又問何因二轉輪王不同時出答轉輪聖王
往昔修因其事廣大謂於長時勤修諸善同
一妙蓋普覆一切一輪王出觀諸衆生同一
子想一輪王出同一境界尊重供養隨所應

作一切善業勝願果報現前克成由是因故
二轉輪王不同時出

又問何因二佛如來應供正等正覺不同時
出答菩薩往昔修因其事廣大謂於長時唯
一師教一種修習作諸善法隨其所作同一
解脫唯一所尊唯一大智作諸善業長養成
熟於一時中無二果報現前所起此復云何
答二難並故以是因故於一時中二佛如來
應供正等正覺不同出世
又問何因女人不作轉輪聖王不成帝釋不

成梵王不成魔王不證緣覺菩提不證無上
正等菩提答謂諸女人善力劣弱男子勝善
樂欲根力之所建立以其極生善欲心故女
無勢力皆是男子善業因作又復女人無其
利根唯彼男子善力成故又彼男子善力增
極乃能獲得利根勝業以如是因故女人不
作轉輪聖王不成帝釋不成梵王不成魔王
不證緣覺菩提不證無上正等菩提
又問何因佛世尊者具無邊智具無邊慧無
邊辯才答菩薩長時於其三慧親近修習廣

多施作謂聞所成慧思所成慧修所成慧增
極勤勇以如是因故佛世尊具無邊智慧無
邊辯才

又問何因佛世尊出清淨妙音普聞三千大
千世界悉令曉了答以佛世尊成道未久住
梵界已普令親近得聞解脫頌句頌曰

安住諸佛正教中 發起精進求出離
能破生死大力軍 猶如狂象在草舍
今此清淨正法律 不放棄心善所行
即能斷滅生死輪 乃盡一切苦邊際

如是頌句一一世界一一衆生普皆得聞分
明曉了此是如來清淨妙音普聞三千大千
世界

施設論卷第三

施設論卷第四

宋西天三藏朝散大夫光祿卿光祿寺卿惟淨等奉 詔譯

對法大論中因施設門第六之二

論中間曰有何所因而能了知正覺世尊於
諸衆生大悲超勝答世尊為見世間衆生染